

TE NENEURAA API

NENEIHIA I ROTO I TE PIHA NENEIRAA A TE EKALESIA A IESU MESIA I TE
FEIA MO'A I TE MAU MAHANA HOPEA NEI.
PAPEETE, TAHITI, I TE MAU AVA'E ATOA.

Te hoo: E 2 farane i te matahiti.

No. 2

Febuare 1937.

Mat. 31.

E imi maite, e pure pinepine mai te faaroo, ei reira te mau mea atoa e faarirohia'i ei maitai no outou, ia afaro ra to outou haerea, e ia haamana'ohia te faufaa ta outou i fafau, outou outou iho. B. F. 90. 24.

Te Hanahana O Te Taata.

TE horoa nei te Ekalesia a Iesu Mesia i te pahono-raa tano maitai i te uiraa tei tuuhia e te taata papai salamo a na ô ai oia e: *Eaha te taata nei i mana'o mai ai oe ia'na? e ta te taata nei tamaiti i haapao mai ai oe ia'na? I raro iti a'e oia i te mau melahi i te hamaniraahia e oe ra, e ua faakoronahia oe ia'na i te hinuhinu e te tura! Sala. 8:4-5.*

Te pahono nei matou, e tamarii te taata na te Atua, to'na hopea, te tumu o to'na here faito ore e te pu o to'na aroha. Ua faaite mai te Mana Hope e; *Ta'na ohipa e To'na hana-hana o te faataeraa te taata i te tahuti ore e i te ora mure ore.* No reira te haapao noa nei â Oia ia ratou.

No te mau taata atoa tei tiaturi papu i te ohipa a te Faa-ora o teie nei ao, e mea faufaa roa na ratou te haapaoraa e te haapiiraa i te taata.

I to'na fanauraa aita'tu e mea paruparu mai te taata te huru. Noa'tu ra i te reira, te vai ra i roto ia'na te mau ravea hope ore, te mau faufaa tei noaa mai na roto i to'na mau metua no te ao ao nei e no te ra'i. Te tumu rahi no to'na haereraa mai i ô nei, no to'na oraraa, o te haamaitaira ia i to'na mau atributi, ia faarahi i to'na mana e ia titau ia naeahia ia'na te hohoa e te hanahana o Tei hamani ia'na.

Te hanahana e te faufaa ta tai tahi o te taata nei te mau tumu no te hapiiraa na te mau Feia mo'a no te mau Mahana hopea nei. E te tumu o taua religion ra, o te tautururaa ia i te taata ia imi i to'na tiaraa mau e ia noa ia'na to'na ra parahiraa hanahana. Na mua a'e i te hamaniraahia o te ao nei e te haereraa mai te taata i nia iho, ua faaotihia te hoê hohoa, i roto i te mau apoora i te ra'i e te mau varua hope ore, no to'na haereraa i mua. Te amui nei taua hohoa ra i te varua mau o te ohipa a Iesu no Nazareta. Te horoa nei te reira i to te taata nei tiamâ, te mana ia'na ia maiti, ma te tuu i nia ia'na te mana, ma te tauturu o te ra'i, ia aratai oia ia'na iho i to'na hopea.

Noa'tu i te huru ua amui maitehia te ora o te taata i te mau tutavaraa o te ao nei tei arataihia e tei faauruhia mai no nia mai.

Te tuu nei te faaroo Momoni, ma te tapea ore, i nia i te taata ta tai hoê, te utua no te faaoraraa ia'na e te parau nei oia e: *e ore roa te taata e ora i roto i te pouri: e eita oia e oioi atu i te ora i te noaaraa te ite ia'na.* Area te ite te au no te faaoraraa i te taata, ia riro ia ei ite tamau noa. O te hoê ite tei amui maitehia i te oraraa nei e tei itehia na roto i te huru o te oraraa nei, o te ite ia te faa ahui i te varua.

Te faaroo nei matou e, e faarahihia te mana'o o te taana roto i te faaora o te Mesia ma te tautururaa e te mana no te Evanelia a Iesu Mesia.

No te faaora ia tatou eita e tia ia farii noa te mana'o e te faaaiteraa e, e faaroo to'na. Te haereraa rahi o te ora o te haavîraa ia ia'na iho na roto i te aroraa e rave rahi, te mau peapea e te mau mauui, e tae noa'tu i te taime ua ite te taata i te auraa o te ture, e ia au to ratou mau oraraa i te parau mau.

Mai te mea e tamarii te taata na te Atua, mai te mea te haapao noa ra te Mana hope i ta'na huaai, e riro ia to'na hanahana i te faaora e te faateitei i ta'na mau tamarii. E mai te mea ua riro te Ekalesia ei ravea no te taeraa i reira, e mea tia ia ia riro ei ohipa na'na te horoaraa i te hoê ravea ia tae te taata i nia i te ohipa, ia faaanaanatae e te tauturu ia'na i te faaafaro i te mau mea fifi o te oraraa ma te tiaturi e te itoitito, e ia faaapu i te mau viretu papu tei riro ei niu no te oraraa maitai e te oaoa. E tuu atoa oia i te hoê auraa e te hoê tumu i roto i ta'na mau titauraa o te tauturu ia'na ia riro mai to'na na metua i te ao ra.

O te hoê ohipa teie tei farii papuhia e te mau Ekalesia atoa e tei faaite papuhia i roto i te tuatapapa o te Ekalesia Moni.

Ua rave oia i te mau ohipa fifi e te mea ohie. Te vaereraa e te faaapuraa i te mau fenua apî, ua riro ia te reira ei tamataraa i te faaroo, te itoitito, te puai e te ahu varua o te taata ma te faito tei ore roa i taeahia. Ua papai te punaa Moni i te hoê pene parau nehenehe roa i roto i te parau tuatapapa no te haavîraahia e te faaapuraahia o te fenua Amerika.

Ua faaitoitito atoa oia i te haapiraa i te taata i roto i te auraa mau o te parau e haapiiraa. Ua haapao atoa oia i te mai-

tai o te mau tamarii e ua haapao i to ratou mau hautiraa ia riro te reira ei tautururaa i to ratou haapiiraahia e i to ratou oaoa. Ua faatia atoa oia i te hoê ravea rahi no te parururaa i te tino i te mau ma'i e na roto i te reira ua faaroahia te oraraa o to'na mau taata. Ua faaitoito oia i te utuafare e te fetii na roto i ta'na haapiiraa e, e mea mo'a e te mure ore te faaipoiporaa. Ua faatupu oia i te hoê ravea, ohie e te papu no te tautururaa ia ratou i te pae tino. Ua faatia atoa te nunaa Momoni e ua paturu maite i te hoê ohipa Missionare tei ore roa i taeahia to'na faito, e te tahi, i nia i te ao atoa nei; e ohipa moni ore, tei aano roa e e hopea rahi to'na. Ma te tai'o ore i te reira, ua farerei oia i te mau ati atoa ma te itoitoe e i te tau tamai ua horoa oia i to'na mau taata e ta'na moni. I te tau hau ua turu oia i te mau ohipa maitai atoa.

I na tau i mairi a'enei, ua tai'o te Hau America i te tahi mau tabula no nia i te rahiraa o te mau melo paari i roto i te mau faaroo e i nia i to ratou nuuraa i mua, mai te matahiti 1902 e tae noa'tu i te matahiti 1926. A tai'ohia'i taua mau tabula ra, iteahia ihora e, tei mua roa te Ekalesia a Iesu Mesia i te Feia mo'a no te mau mahana hopea nei no te melo api i noaa mai, e te vahi faahiahia roa, te faaite maira oia e, e ua hau atu te tane i te afa o to'na mau melo paari ra, o te hoê mea maere roa.

E mea ohie roa te haamaramarama i taua vahi ra ia taa maitai te faanahoraa e te faatereraa i te mau ohipa no te Autahu'araa.

Te vai nei, i roto i te Ekalesia Momoni, e 75.000 e tiaha-pa taata api i raro iho i te 21 matahiti tei faatoroahia ei diakono, haapii e ei tahu'a, i roto i te Autahu'araa iti, oia hoi te Autahu'araa a Aarona, e te vai ra e 85.000 taata mai te 21 matahiti a haere atu ai i nia, tei mau i te toroa peresibuteri, hitu ahuru e te tahu'a rahi i roto i te Autahu'araa a

Te Autahu'araa, mai te au i tei itehia e te Momoni, o te mana tei horoahia mai i te taata, e to'na Metua i te ao ra, e tei faatia ia'na ia mono ia'na i roto i te ohipa. E riro ia te taata ei mono no Tei hamani ia'na i te tautururaa i to'na taata tupu i te faatereraa i te mau ohipa no te Ekalesia. E noaa te mau maitai rahi i te taata rii haehaa. E tia i taata te purumu i te tahua o te hoê fare raveraa ohipa, ia parahi i roto i te pûpû, e a ore ra, te apooraa no te Autahu'araa tei parahihia e te fatu o taua fare ohipa ra. E tia i taua taata purumu fare ra ia riro ei hoê no te mau taata faatere no te apooraa tei parahihia e raua. E au atura te vaira te parau tia mure i te mea e, ua huru teitei a'e te faito tia no to te taata i ta'na mau faufaa e to'na tiaraa i roto i te amuiraa taata. Ua riro te Autahu'araa, i roto i te Ekalesia Momoni, ei faito tia no te taata, eiaha i te faahaehaaraa ia ratou, i te faateiteiraa ra ia ratou atoa.

Te Autahu'araa, o te puai ia no te Ekalesia, te pihaa o to'na mana. O te parau tia ana'e te huru otahi e faaravehia'i te autahu'araa, te tumu hoê roa ra no to'na raveraa e te ravea hoê roa ra e manuia'i ai oia.

Ua faaite papuhia te reira i roto i te parau faaite, tei fariihiia e te Ekalesia, no te Atua mai, tei faaafaro e tei faatere ia'na: *Ua amui hoê hia te mau tiaraa o te Autahu'araa i te mau mana a te ra'i e e ore roa e tia ia hi'opoahia te mau mana o te ra'i, maori ra na roto i te parau tia Ia imi tatou i te hi'opoa e te faatere na roto i te haavî. . . E oto te varua o te Atua; e ia haere è Oia, Amene ia i te autahu'araa e te mana o taua taata ra. B. F. 121:36-37.*

Te tumu rahi no teie nei opuaraa e no te mau tutavaraa

ia manuia, o te faaupuraa ia te au taeaeraa o te taata, te faaoraraa e te faateiteiraa i te taata, te haamaitai e te faa-oaoa i te ao nei, te faaore i te haavîraa na roto i te parau mâruraraa, te puai na roto i te maitai, te teoto na roto i te here, te au ore na roto i te aroha e te haavîraa na roto i te tiamâraa.

Papathia e Bryant S. Hinckley.

Te Peropheta tei hau i te rahi.

MAI te anotau o Mose e tae noa mai i te anotau o Iesu, ua auraro noa te mau nunaa Iseraela i te mau ture a Mose, e i roto i taua anotau atoa ra i hopoi atoa ai ratou i te mau tusia i mua i te aro o Iehova.

A'roohia'i to Iseraela i te mau ati ra, ua tohu mai te mau peropheta i te mau parau tohu no te taeraa mai o Iehova. Faaite maira taua mau peropheta ra e, e fanau mai o Iehova ra, i te pae tahuti nei, e na'na e faaite mai i to'na mana faaora i to te ao nei.

Te na ô maira o Mose: *E faatupu vau i te tahi peropheta na ratou i to ratou mau taeae, mai ia oe na te huru, e e tuu vau i ta'u parau i roto i tana vaha, e na'na e parau atu ia ratou i te mau porau atoa ta'u e faaue atu ia'na ra; e te ore e faaroo mai i te parau na'u ta'na e parau ra i to'u nei i'oa, e faautua'tu ia vau ia'na. Deuteronomi 18:18-19.*

O Iesu iho te peropheta i parauhia nei, oia hoi o Iehova ia, i te paeau tino nei.

Na roto mai i te vaha o Isaia, o Ieremia, o Ezekiel, o

Hosea e o Mika i tae mai ai te mau tohu e rave rahi, tei faaite mai e, e faatupu mai te Fatu i te hoê peropheta o te hau i te rahi ia ratou ra.

Ua faaaita maira ratou i te huru o to Iesu fanauraa, e te tahi mau i'oa te topahia i nia ia'na e te huru o to'na ra oraraa i te ao nei. Ua faaite atoa mai ra te mau peropheta i te huru o to'na poheraa, no te mau hara o to te ao nei.

Na Iesu iho i faaite mai ia tatou i te huru mau no te mau tohuraa a te mau peropheta ia Iseraela ra.

A hi'opoa tatou i ta'na parau i ta'na mau pîpî i te po no te mahana tia-faahou-raa. Ua na ô maira Oia e: *Oia teie ta'u i parau atu ia outou a parahi atoa'i tatou ra, e ia hope te mau parau atou no'u i papaihia i roto i te ture a Mose, e te mau peropheta, e te salamo i te faatupuhia e tia'i. Ua faaite maira oia i to ratou aau ia ite ratou i te parau i papaihia ra. Ua na ô maira oia ia ratou. I na reirahia taua parau ra i te papai, e ia na reirahia to te Mesia pohe e tia'i, e ia tia-faahou mai te pohe mai i te rui toru; e ia poro-haere-hia te tata-rahapa e te faaoreraa i te hara i to'na ra i'oa, na Ierusalema tu nei â, e ati noa'e te mau fenua atoa e tia'i. E teie nei, ei ite outou i teie nei mau parau. Luka 24:44-48.*

Ua maere te taata i to'na ite e i ta'na haapiiraa i te mau parau a te Atua. *I haapii hoi oia ia ratou ma te mana, e ere mai ta te mau papai parau ra. Mataio 7:29.*

E rave rahi te mau parau tohu a Iesu, e e ohipa tei hau i te rahi ta'na i rave, no reira i riro ai Oia ei Tahu'a rahi ia au te parau a Melehizedeka; Oia atoa te Peropheta tei hau i te rahi i te mau peropheta atoa ra.

Papahia e Anderea Sedama. a.

NA PUTUPUTURAA E PITI.

I NA matahiti e toru na mua a'e i to Adamu poheraa, ua haaputuputu oia i ta'na mau tamarii parau-tia i roto i te hoê amuiraa rahi i te tufaa fenua ra O Adamu Onodi Ahamana. (Te vai noa ra teie tufaa fenua i America i te tufaa fenua ra i Spring Hill, i roto i te mataeinaa ra i Davis, i te fenua Missouri.) I reira oia i horoa'i i ta'na haamaitairaa hopea i nia iho i ta'na mau tamarii, e i taua taime ra, oi vai a'e te amuiraa, ua fâ maira te Atua, no roto mai i te ra'i, i te na ô raa e: *Ua tuu vau ia oe na, o Adamu, ei upootia no te feia paatoa o teie ao nei, e ua riro hoi oe ei arii i teie nei e a muri noa'tu.*

I muri a'era ua tia te mau tamarii i nia e ua haamaitai ratou i to ratou metua, e ua poro ia'na o *Mihaela*, te *ari* o te taatoa, te melahi rahi; i muri ihora ua tia hoi o Adamu i nia e ua tohu oia i te mau ohipa ta te feia o te ao nei e faaoti e tae noa'tu i te hopea, e i roto i taua tohuraa ra, ua i oia i te varua maitai.

Te fatata mai nei te tahi apooraa o te feia mana o te ao ra, i roto i taua vahi iho ra, e na taua ihoa taata ra e faatere, oia hoi, To te mau mahana tahito ra, oia atoa hoi, to tatou metua i te pae tino nei. Ei reira e faatupuhia'i ta Daniela tohuraa ta'na i ite i roto i ta'na orama ra, tei na ô mai e: *Te hi'o ra vau, e haamauhia ihora te mau terono, e ua parahi maira To te mau mahana tahito ra, o tei au to'na ahu i te hionna i te teatea, e te rouru o ta'na upoo, mai te huruhuru mamoe maitai ra ia, e auahi ura to'na terono, e to'na pereoo e auahi ama ia.* Daniela 7.9. E i roto i teie nei apooraa e oti ai te ohipa faaineineraa hopea no te haere piti raa mai o to tatou Fatu, e i reira hoi o Adamu e faaho'i atu ai i to'na toroa tiaai i te Mesia, mai te au i te tahi pae o to Daniela tohuraa.

Hi'o i hora vau i taua orama i te rui ra, e inaha, te hoê mai te Tamaiti a te taata ra i te haerea mai na roto i te mau ata o te ra'i ra; e ua haafatata'tura oia i To te mau mahana tahito ra, e tuuhia i hora i pihai iho ia'na. E ua horoahia maira te mana, e te hinuhinu, e te basileia no'na, ia auraro mai te taatu atoa, e te mau fenua atoa, e te reo atoa ia'na; to'na mana, e mana mure ore ia, e ore ia e mou, e to'na basileia, e ore ia e pau. Daniela 7:13-14.

Ia haapao ratou i teie amuiraa ra, eita te ao paatoa nei e ite, eita atoa hoi te Ekalesia paatoa — maori ra, o ratou ana'e te anihia'tu e te feia mana, no te mea e, na mua teie i te tae-piti-raa mai o te Mesia, e *te haere maira taua mahana o te Fatu ra, mai te haerea mai o te eia i te po ra. I Tesalonia 5:2.*

E teie nei, e ara, aore hoi outou i ite i te hora e tae mai to outou Fatu. Mataio 24: 42.

Papahia e Bentamina Orometua.

E PARABOLE.

I TE hoê anotau i mairi a'enei, ua tanu te fatu no te hoê ô rahi roa i te hoê tumu raau. Te maa no teie tumu raau, e mea monamona, e e mea maitai atoa i te mau taata tei amu. I muri rii ua tupu e ua hotu mai teie tumu raau e ua hotu mai i te maa; area râ, ua ueue te hoê enemi i te tahi mau luero aihere i roto i te ô, ia haapohehia teie tumu raau maitai. Ua taparu atoa te enemi i te tahi mau tavini no te fatu ia vaiiho i te aihere, ia ore te tumu raau ia tupu, e aita i maoro ua ino roa te tumu raau i te aihere.

Mairi ihora te tahi nau matahiti e oto roa a'era te fatu o te ô no te inoraa te tumu raau. Ua mana'o ihora oia e tanu faahou i te tahi â tumu raau maitai i roto i te ô. Aita râ oia i vaere i te aihere i te vahi tahito, ua faane râ oia i te tahi mau tavini ia haere i te hoê vahi atea e, i roto i te ô, ia faa-ineine i te fenua no te tanuraa i te tumu raau.

Ua itoitō roa teie mau tavini e ua haapao ratou i te parau a te fatu. Aita râ i rahi te aihere a te enemi tei tupu i te reira vahi e aita'toa i rahi te ohipa no te vaereraa i te fenua e ia faa-ineine i te vahi no te tanuraa i te tumu raau.

Ua faaue atoa mai te fatu, i te mau tavini, ia patu i te hoê aua ia paruruhia teie vahi apî i te enemi. I te oti roa raa teie ohipa ua haere mai te fatu, e ta'na mau tavini; ua afai atoa mai ratou i te tumu raau maitai. Ua tanu te fatu i te raau e ua tuu oia i te tahi mau tavini ei tia i taua tumu raau ra, e ua tupu noa ma te peapea ore.

TEIE IA TE AURAA:

Te ô, o te ao nei ia. Te fatu, o to tatou ia Fatu, tei haere mai e hoê tauatini e iva hanere e tiahapa matahiti i mairi a'enei ia pohe no te mau hara o te ao nei. Ua tanu atoa Oia i te tumu raau, oia hoi, te Evanelia, e ua haapii atoa hoi Oia i te reira i ta'ua mau pipi. Te enemi, o Satane ia, tei faatupu i te ohipa ino i te Evanelia, e i muri iho aita i iteahia te evanelia mau a te Fatu i nia i te fenua nei.

E rave rahi te mau matahiti tei pau ma te ite orehia te Evanelia mau i nia i te ao nei, no reira, ua hinaaro ihora te Fatu e faaho'i mai i te Evanelia mau e e faatia faahou i taua Ekalesia i nia i te ao nei. No reira ua maiti Oia i te hoê vahi tano ia tia i te mau taata ia faaroo i te parau mau e ia paruruhia to ratou tiamâ, no reira, ua faauru Oia ia Columbus ia haere i te fenua America.

Te mau tavini ta te Fatu i tonono e faaineine i te fenua, no te tanuraa i te tumu raau, o te mau taata matamua tei haere i te fenua America, mai te matahiti 1620 e tae noa'tu i te matahiti 1830. Ua hinaaro teie mau taata i to ratou tiamâ e ua rave itoito ratou i te ohipa no te faatiamâ ia ratou.

Te aua ta ratou i patu, o te mau ture parau tia ia ta ratou i papai ia paruru i te mau taata e tei faatia ia ratou ia haamori ratou i te Atua mai te au i to ratou iho hinaaro.

I te taeraa mai te Fatu, ua tae atoa mai ta'na mau tavini o Moroni, o Petero, o Iakobo e o Ioane, o tei afai mai i te parau apî maitai, no te ra'i mai. I reira ua pii te Fatu i te tahi mau tavini ia a'o i te Evaueia i te ao nei.

Te tavini matamua, o Iosepha SEMITA ia!

Papathia e Norota Orometua

Te Faaroo i amuihia e te Ohipa.

Eaha te faufaa, e au mau taeae, ia parau mai te hoê e, e faaroo to'na, e aore a'na e ohipa, e ora anei oia i te faaroo? Ia pohe hoi te hoê taeae, e te hoê tuahine i te veve, e aore e maa i te mau mahana atoa ra, ia parau atura te hoê o outou ia raua ra, Ia ora na i te haerea, ia mahanahana hoi orua, e ia paia hoi, aita râ i horoa'tu i te mea e maitai ai te tino ra; eaha to reira faufaa? Oia atoa te faaroo, aore e ohipa ra, e mea pohe ia, i te mea te vai hoê noa ra. E tia noa hoi te hoê taata ia parau mai ia'na e, E faaroo to oe, e ohipa ta'u, a faaite mai na oe i to oe faaroo, aore e ohipa ra,

a faaite atu ai au ia oe i to'u faaroo i ta'u nei ohipa. Ua faaroo oe i te parau e, hoê roa Atua; ua tia te reira, ua faaroo atoa hoi te mau demoni i te reira, e ua rurutaina. Ia ite mai râ oe, e tera ra taata mana'o ore, o te faaroo aore e ohipa ra, e faaroo pohe ia.

Iakobo 2:14-20.

Te Oaoa o te Taata tei mata'u ia Iehova.

E haamaitai ia Iehova. E ao to te taata i mata'u ia Iehova ra: tei riro roa to'na aau i ta'na parau.

E mana hoi to'na huaai i te fenua nei; e maitai hoi to te tamarii a te feia parau tia ra.

E atuatu tei to'na fare e te tao'ahia; e tia ta'na parau-tia i te vai maite raa.

Ei te pouri nei e hiti mai ai te maramarama i te feia parau tia: e te hamani maitai, e te aroha, e te pi'o ore.

E hamani maitai to te taata maitai, e horoa ta'na ia tipeehia mai; e rave oia i ta'na mau peu atoa ra ma te haapao; e ore roa oia e arori, e mana'o tamau-hia te feia parau-tia, e a muri noa'tu.

E ore oia e mata'u i te roo ino ra; ua mau to'na aau i te tiaturiraa ia Iehova.

Salamo 112: 1-7.

Louis Drollet Gérant

Le Roy Mallory Imprimeur.

Rue Dumont d'Urville, Orovini, Papeete, Tahiti.